

Ministru Estadu no Prezidénsia Konsellu Ministru, Agio Pereira

Obituáriu (Relasiona ho Óbitu): Kevin Sherlock 8.3.1934 – 2.10.2014

Kevin Sherlock hela tinan barak iha Darwin no hala'o moris oin rua. Ba sira ne'ebé ladún koñese diak nia, nia maka ema ida ne'ebé moris simples ho fa'an jornál, ne'ebé hela ho hakmatek iha apartamentu ki'ik ida iha sidade Darwin ninin.

Ba ninia belun barak iha Austrália no Timor-Leste laran tomak, nia hanesan ai-knanoik ida. Nia hanesan ensiklopédia móvel ida no nia apartamentu ne'e hanesan biblioteka ne'ebé la mamuk, ho fatin tau livru nian iha didin lolon hotu-hotu, nakonu ho livru no dokumentu kona-ba istória Timor nian.

Kevin nia interese ba Timor hahú depoizde nia pasa férias ida iha Díli, iha fulan jullu tinan 1974. Fila husi férias ne'e, nia vizita biblioteka Darwin nian atu halo peskiza ida hodi prepara vizita seluk ne'ebé mak nia planeia hela iha tempu ne'ebá, maibé nia frustradu bainhira hetan de'it dadus balun. Hafoin destruisaun ne'ebé kauza husi siklone Tracy, nia fila hikas ba Adelaide, no iha ne'ebá nia vizita biblioteka no muzeu Australia Sul nian no hasai kópia husi buat hotu ne'ebé nia konsegue hetan kona-ba saída mak Timor Português. Ida ne'e maka sai hanesan inísiu husi obsesaun ida ne'ebé dura iha nia moris tomak, ne'ebé halo Kevin aprende português no halo viajen ba Camberra, Sydney no Melbourne, karik mós, ba Portugal no Makau durante nia férias anual, tanba iha fatin sira ne'e maka rai rejistu kolonial português nian sira. Peskiza no viajen sira ne'ebé nia halo, barak liu nia uza nia osan rasik, no bainhira reforma, nia kontinua nia peskiza ho osan husi nia pensaun reforma nian.

Ha'u koñese Kevin molok nia halo vizita dahuluk ba Portugal no ha'u hatene lalais de'it kona-ba importánsia boot husi ninia serbisu ba ita nia povu. Ita nia identidade nasional iha hela risku atu lakon iha momentu ne'ebá, tanba ne'e, informasaun ne'ebé mak Kevin rekolla hela iha tempu ne'ebá importante tebes ba ita nia luta. Ninia arkivu kompostu husi livru rihun ba rihun, rekorte husi jornál no dokumentu sira, ne'ebé rai didi'ak iha pasta sira tuir indeks, iha bolsu plástiku nia laran. Kevin iha rejistu husi Northern Territóry Times no Gazette ne'ebé barak tebes iha inísiu tinan 1900, husi rejistu sira ne'e, barak mak nia hakerek fila-fali ho mákina hakerek nian tuan ida, no kópia husi sitasaun hotu-hotu husi Northern Territory News ne'ebé koalia kona-ba Timor, dezde inísu husi nia publikasaun iha tinan 1950.

Kevin nia peskiza estudante no akadémiku sira husi mundu tomak maka konsulta ona to'o oras ne'e no sai hanesan kolesaun ida ne'ebé ladún barak husi rejistu sira kona-ba Timor iha ukun koloniál portugúés nia okos. Ha'u husu bebeik ba nia atu tau informasaun importante ki'ik ida ne'ebé nia kopia iha nia fotokopiadora, ne'ebé okupa fatin espesiál ida iha nia kuartu estra. Nia lakoi atu tama ba iha era dijitál no hakerek de'it ho mákina hakerek nian ninia nota sira, maske hetan ona oferta komputador no kursu formasaun nian sira. Nia mós hanesan espesialista ida iha múzika tradisionál timor nian.

Iha ha'u nia vizita ida ba Darwin ha'u lori televisaun foun ida ba nia, atu troka tiha ninia TV tuan ho kor metan mutin. Nia kontente no dehan mai ha'u katak nia nunka simu prezente ida hanesan ne'e, no nia hahú hanoin kedas oinsá maka prezente ne'e bele afeta ninia pensaun. Kevin ema ida ne'ebé onestu tebetebes no respeita ema hotu ne'ebé nia koñese iha nia moris.

Kevin hodibiit moris ho kankru iha tinan barak nia laran no bele dehan katak ninia domin ne'ebé boot no ho laran ba nia projetu peskiza kona-ba Timor mak motiva nia hodi moris. Ninia servisu ne'ebé nia halo ba povu Timor hetan rekoñesimentu formál iha Maiu tinan 2010, bainhira simu kondekorasaun ofisiál husi Prezidente Ramos Horta, iha serimónia ida iha Parlamentu Nasionál iha Díli.

Bainhira de'it, karik ha'u telefone ba Kevin, husu atu ko'alia ho "Sherlock Homes" nia hamnasa bainhira nia hatene katak ne'e hau. Nia investiga istória Timor nian ho vigór intelektuál no kompromisu husi personajen Sir Arthur Conan Doyle.

Iha tempu ne'ebé ita lamenta ninia mate, nia sei hamutuk ho ita, tanba nia husik hela ninia kolesaun sura labele ne'e ba Universidade Charles Darwin, atu nune'e akadémiku no labarik Timor-Leste nian aban bainrua bele halo investigasaun no aprende ho ita nia pasadu.

Nia ema di'ak ida duni

Kevin Sherlock mate iha Ospital Royal Darwin iha loron 2 fulan outubru tinan 2014